

# Cun referents externs

La Distec SA envida a sia revista professiunala annuala

■ (anr/hh) Era uonn organischa la **Distec SA a Mustér ina revista professiunala. Giuvenils che frequentan il scalem superiur han la caschun d'emprender d'enconuscher differentas interessantas professiuns technicas.** Uonn sa la Distec SA a Mustér festivar il giubileum da 25 onns. 1989 ei il menaschi dalla Landis e Gyr numnadamein vegnius els mauns da *Rico Hug*, respectivamein dalla RH Hoding. Il mument occupa l'interpresa rodund 90 collaboratur(a)s ed emprendist(a)s. Ultra dallas localitads da svilup e da produziun a Mustér dispona l'interpresa era da luvratoris ell'anteriura Fabrica da ponn a Trun. La gronda part dallas lavurs exequidas a Mustér offerescha la Distec SA allas branschas dalla tecnica medicinala e da labor, l'aviatica, la construcziun da maschinas, la tecnica d'electronica e l'industria d'autos. En cumparegliaziun cun pli baul ha l'interpresa oz clientella sin different secturs. La dependenza da singuls clients pli gronds ha saviu vegnir eliminada per gronda part ils davos onns.

## Ina revista professiunala

Dapi plirs onns porscha la Distec SA allas scolaras ed als scolar dil scalem superiur, sco era a lur geniturs, la pusseivladad d'emprender d'enconuscher las professiuns ch'ella offerescha a ses emprendists. Igl ei quei il polimecanist ed il mecanist da produziun. Il medem mument dat ella denton era la pusseivladad da prender investa da sias localitads e dils process da lavur, en special la tecnica da metal. Involvi en quella revista professiunala

vegna era las emprendistas ed ils emprendists dalla Distec SA. Els presentan sezs lur lavurs. Aschia obtegnan las interessantas ed ils interessants investa el las incaricas dils dus emprendissadis. Medemamein vegnan els orientai davart las pusseivladads da perfecziun che seperschan suenter il temps d'emprendissadi.

## Dus referents externs

La revista professiunala d'uonn vegn enrihida dallas informaziuns da dus referents cumpetents. Dad ina vart ei quei il cusseglader da professiuns dalla regiun Surselva, *Vendelin Cabernard*, dall'otra vart il responsabel per la perfecziun da Swissmechanik, *Roland Stoll*. Ils dus referents dattan plaid e fatg davart l'elec-

ziun dalla clamada sco era davart la scolaziun dils emprendists e las pusseivladads da perfecziun. La revista professiunala vegn cumbinada cun ina viseta dallas differentas partiziuns dalla Distec SA e concludida cun in apertura cun la pusseivladad da tschentar damondas. Ellas partiziuns exista la pusseivladad da prender investa dil parc da maschinas top modern dall'interpresa.

## Tecnica sil pli ault stan

La Distec SA ha buca mo modernisau sias partiziuns ils davos onns, mobein era dau novs accents alla scolaziun dils emprendists. Il november passau ha ella installau ina nova fresa da CNC cun tschun ischels per la scolaziun dallas emprendistas e dils emprendists. Cheutras duein quels vegnir confruntai gia baul egl emprendissadi cun la pli nova tecnologia. La finamira dalla Distec SA ei da dublegiar ils proxims onns il diember d'emprendists. Sil sector dallas lavurs cun CNC regia numnadamein ina munconza generala da persunas qualificadas en Svizra. Quei senta era la Distec SA. Cun pusseivladads da perfecziun vul ella plinavon empruar da tener egl avegnir ina part dils emprendists el menaschi per aschia saver garantir era a liunga vesta lavurs pretensiusas e d'aulta qualidad. La revista duei gidar ils giuvenils ad anflar lur via professiunala.



La Distec SA a Mustér porscha la pusseivladad d'emprender interessantas ed attractivas professiuns sil sector tecnic.

FOTO H. HUONDER

Revista professiunala ella Distec SA a Mustér mesjamna, ils 12 da mars 2014 naven dallas 16.00.